



Ruina da la
baselgia da son
Gaudenzio a
Casaccia. MAD

L'antica baselgia da pelegrinadi a Casaccia

Duas publicaziuns novas

■ (gsc) **La Bergiaglia è ina da quellas valladas reticas che ston mintga en-viern avoir tema da vegnir separadas per dis dal rest dal pajais. Tgi che vegn a Plaun da Lej e Malögia (1815 m) sto lura pudair ir enavant vers Clavenna en Lumbardia (333 m).** La val «s'extenda sur 32 km da Malögia vers il sidvest a Clavenna, cun ina pendenza da 1500 m (...). Ma la B[ergiaglia] è adina s'orientada vers il nord. Ella (...) è la suletta vallada tal[jiana] ref[urmada] dal Grischun (2000 70% ref[urmads])» (1). La fracziun la pli auta da la Bergaglia è Casaccia (1458 m), al pe da dus pass: Il Malögia vers l'Engiadina ed il Set (2300 m) vers Surmeir. Quest vala oz mo pli per viandar, ma il Malögia cun sias stortas è anc adina in problem.

Processiuns medievalas a S. Gaudenzio

«La baselgia da S. Gaudenzio sur C[asaccia] (devastada il 1551, lieu da pelegrinadi) è doc[umentada] l'onn 840 sco possess da l'abazia da Faveras» (2). Il nr. 1-2019 dals «Quaderni grigionitaliani» (Qgi, Pro Grigioni Italiano, Cuir, ISBN 9788885905153) deditgescha dus artitgels a quella baselgia, l'emprim al bajetg (da Diego Giovanoli, anteriur collavuratatur dal Servezzan chantunal da monuments) (3) e tselhel al cult (da l'istorica ecclesiastica Saveria Masa, scheffa da l'Ecomuseum da la Val Malenco) (4). Lezza vallada cumenza a Sonder e maina fin al Pass dal Müret (2562 m). Masa punctue-

scha: «La posiziun centrala da Casaccia motivescha tutt'atg il regal da lezza baselgia tras Carl il grond a l'abazia da Faveras (...) per proteger l'impurtanta via da Cuir sur il Set e Casaccia a Clavenna e l'Italia (...). Ins di che Tinizong haja venerà ils sontgs Placi e Luzi e manà lur statuas en processiu fin a s. Gaudenzio da Casaccia. En in onn da gronda sitgira temeva la gliend da Tinizong per sia survivenza. Lur è la ida en pelegrinadi vers Casaccia sur il Set cun las duas statuas a ruggar per plievgia. I para ch'ella n'haja betg stuì spetgar: Sin via a chasa haja cumenzà a daratgar uschè ferm ch'ella haja stuì chattar ina susta cun stenta e fadia a Beiva per las statuas (...). Da la Val Malenco partiva mintg'onn in pelegrinadi da cuminanza vers S. Gaudenzio da Casaccia (...). Ins gieva sur il Pass dal Müret, il qual colliava Sonder cun Engiadina e Bergaglia tras la Val Malenco (...). Gia dal 13avel tschientaner stipulav'ins maridaglias tranter 'Bargajot' e 'Malenchin' (...). Tiers vegniva il ferm liom religius dals 'Malenchins' cun S. Gaudenzio da Casaccia (...). In 'Registro delle memorie' tar l'archiv parochial da Lanzada [en Val Malenco] documentescha processiuns en 'tempo antico' da tut las plaivs da la vallada a S. Gaudenzio da Casaccia (...). Quai era segir avant la profanaziun da 1551 sin donn e cust da la baselgia da Casaccia (...). Questa aveva oramai pers las reliquias, pia mintga stimulus (...) per in pelegrinadi da duas giadas dus dis e duas muntadas sin il Müret» (pp. 46 e 50–51).

In'ianza medievala è svanida

L'introduziun da Diego Giovanoli pon ins translatar sco suonda: «Avant passa tschintgtschient onns, ils 13 da matg 1518 han ins consecrà gist sur Casaccia ina considerabla baselgia da pelegrinadi promovida da las vischnancas bergiagliottas grischunas (...). Tuttenina suenter, il 1533 han ins manà la reformaziun a Visavraun. En ils onns suandants han tut las pravendas da lezs vitgs (...) recepì il predi empè da la messa. I stuevan pia mantegnair a Casaccia in bajetg cultic inutil. Lur baselgia cun l'ospiz aveva pers sia funcziun oriunda tar il pelegrinadi e l'accoglientscha; i eran oramai negligids ed èn finalmain ids en muschna» (pp. 21–22). Giovanoli manegia ch'il «reformatur Pier Paolo Vergerio haja instigà umens da Casaccia a sfratgar ina fanestra da la sacristia ed a purtar davent las reliquias e la crusch, ils dus simbols liturgics mess en dumonda dals reformatur» (p. 31). Pier Paolo Vergerio (1498–1565), naschì a Capodistria (oz Koper en Slovenia), è stà uestg da sia citad natala, lura reformatur e predigant a Visavraun.

1. Adolf Collenberg en: *Stiftung Historisches Lexikon der Schweiz (HLS), Lexicon Istorico Retico, tom 1. Cuir, Desertina (ISBN 978-3-85637-390-0), p. 83, chavazzin «Bergiaglia».*
2. Adolf Collenberg en: *Stiftung... (v. nota 1), p. 154, chavazzin «Casaccia».*
3. Diego Giovanoli, *La chiesa di San Gaudenzio sopra Casaccia: vicissitudini di una meta di pellegrinaggio in Bregaglia* (pp. 21–42).
4. Saveria Masa, *San Gaudenzio di Casaccia – culto, pellegrinaggi e transiti lungo un'antica via delle Alpi retiche* (pp. 43–54).